

(٣٢)

بحبك يا مصر

بحبك يا مصر وبعشق سكونك..

.. فى ليلك وبعشق فى صبحك جنونك

ولو كان نسيماك وضلك لغيري

ألقى هجيرك يضلل شجوني

بشوفك فى لمة لطاسة القلية

فى قلة فى حصيرة فى سبحة فى غازية

فى أحلام تنبت فى إحباط ولادك

وتتطرح تحدى فى ضحكة صبية

بحس بضميرك يولع ويطفى
ما بين شيخ مضلم و بين كره مخفي
وغلب و سماحة تحسس عيالك
بصهدك يرطب وبردك يدفي

حبيبتى أنا بحلم بليلك نهار
بعْدُلك بيكسى بوارك خضار
بصير الغلابة اللى معجون طيابة
يكون مصل شافى لداء السعار

يا بلدى شبابك ساجنهم كسيح
فى حكمة سفيهة وإقدام جريح
يا إما ربيعهم يخضر مصيرك
ياتستننى لما يعود المسيح

القاهرة ٢٠٠٩/١/٥